



# QUÆSTIO MEDICA.

QUOD LIBETARIIS DISPUTATIONIBUS  
manè discutienda in Scholis Medicorum,  
die Jovis decimâ-septimâ Novembris.

M. LUDOVICO FRANCISCO DUTAL,  
Doctore Medico, Præside.

*An à Spiritibus Morborum Causæ?*

I.

CORPUS humanum, licet unum, compositione ta-  
men est multiplex: hinc à variis variè dividitur, ab  
Hippocrate, in continentia, contenta & impetum fa-  
cientia; illa tam corpori propria sunt, ut vel in mortuo re-  
maneant, & ab Anatomicis demonstrentur: hæc cum ipsâ  
vitâ simul evanescent, sunt quasi corporis & animæ vincu-  
lum, hancque in sensu præditis efficiunt. Substantiæ quidem  
sunt corporeæ, sed adeo tenues & subtiles, ut spiritale quid,  
& corporis expertes videantur, & idcirco spiritus appellen-  
tur: tam efficaces, tantâque agendi vi præditi, ut functio-  
num omnium sint opifices, & ab impetu quem excitant,  
dum in corporibus per proprios sibi tubulos excurrunt, di-  
vino Seni ἐρρηγνῆται nuncupentur.

I I.

PRO triplici functionum genere, triplex à Veteribus sta-  
tuebatur spirituum genus, Naturalis, vitalis & animalis,  
& sua cuique designabatur officina: quod quidem munus  
erat tam nobile, ut partem illam principem efficiebat. At  
cum Ætas nostra jecur expurgando defæcandoque sanguini,  
potius quam conficiendo dicatum esse deprehenderit, illud  
abdica vit suo principatu, spiritumque naturalem, quem in &

629  
132  
LIB. MEDICINÆ  
DUTAL

^ etel.

ab ipso præparari volebant Veteres, rejecit: Etenim cum vita consistat in nutritione aliisque functionibus naturalibus; Quæ spiritum naturalem à vitali distinguendi necessitas? quin imo licet diversæ plane sint functiones vitales & animales, illæque sine iis possint aliquatenus subsistere, dubium tamen est num isti duo spiritus essentiâ vel tantum præparatione & acuratori elaboratione differant. Vitalis quidem in corde sit è tenuiori subtiliorique sanguinis portione, cui, aëris quem expirando ducimus, aliquid admixtum esse nonnulli volunt. Sed assignare vias per quas aër ille feratur in cordis ventriculos, difficile: cum spiritus per easdem vias possent effluere & dissipari. Animales in cineritiâ seu corticali cerebri substantiâ per meram secretionem colatoriam parari generarique, nunc unanimis est ferè omnium consensus; non quidem in ventriculis: cum ii potius excrementis excipiendis & vacuandis destinati sint, à quibus obruerentur & submergerentur spiritus: sicque malè sibi consentiunt Veteres, dum munus princeps cloacis assignant. Ut vitales per arterias, ita per nervos spiritus animales, qui cum longè subtiliores sint, neque ut conficiantur, neque ut per univèrsum corpus diffundantur, manifestam requirunt cavitatem, unde plurimi functiones quarum causæ sunt & opifices, per irradiationem fieri voluere.

### I I I.

**H** O M O prout bene vel male suas exercet functiones, sanus est aut ægrotans: sanitas enim est eas perfectè exercendi potentia, quæ cum ab iisdem benè affectis procedat, erit, ab iisdem male affectis impotentia, quæ morbus est. Sanitatis & morbi subiectum sunt continentia, contenta utriusque causæ sunt & effectus. Sed ea est hominum fors & conditio, ut quæ data naturæ sunt ad robur & tutelam, in ipsius aliquando perniciem convertantur; sicque spiritus qui ad retundendos morborum impetus, impetum facere deberent: illum ipsum in naturam aliquando dirigunt, & morborum causæ nonnunquam evadunt. Quemadmodum enim spiritibus illis existentibus in corpore vitam adesse, & iisdem penitus amissis aut extinctis mortem sequi necesse est: Ita quoque ab iisdem benè vel malè constitutis sanitatem & morbum,

Hæc autem optima constitutio à pluribus dependet, à substantiâ primum, cujus ratione spiritus debent esse tenues, subtiles ætherei, puri & ab omni alienâ re defæcati. Tum à quantitate, sufficienti copiâ, robore, & mensurâ. A qualitate postea, quâ calidi, lucidi, ignei, clari, vividi, mobiles, veloces, halituosi. A motu demum qui prout est ordinatus, rectâ per tubulos à Naturâ destinatos fieri debet. Horum aliquo deficiente, deficit hæc optima constitutio, morbisque generandis evadit aptissima.

## I V.

**E**X Naturali spirituum constitutione, facile est eam quæ præter naturam definire. Eorum enim substantia particulis heterogeneis inquinatur aliquando. Imo etiam arsenicale quid admisceri potest. Non modo foris adveniens, sed & cum intus generentur venena & in majori mundo sint ejusmodi; Quid vetat in minore aliquid analogum produci? Qualitate peccant spiritus, dum frigidi, crassi, torpidi, languidi, densi, tenebricosi. Quantitatis defectus manifestè patet in iis qui nimio labore, jejuniis, venere, aut aliâ nimîâ quavis evacuatione sunt exhausti. Excessus in intemperie calidâ & febribus, in quibus expanduntur, attenuantur & rarefescunt. Peccant in motu, dum eorum influxus prohibetur aut immittitur, aut dum ille depravatur, fitque trepidationis, concussionis aut vibrationis.

## V.

**C**UM igitur tam varii sint modi, quibus à naturali constitutione recedant spiritus, tam varii quoque fontes sunt, à quibus innumera morborum scaturiunt genera. Et enim pro variâ rei naturâ quâ eorum inquinatur substantia, varii sunt: sic ex auræ pestilentis afflatu, morbi pestilentes; Ex narcotici vaporis admixtione, apoplexia, carus: Ex rei suaveolentis halitu, affectus hysterici: Ex crassioribus spiritibus, stupiditas, fatuitas, amentia, sopores: Ex igneis & calidioribus, phrenitis: Ex acribus igneis & densis, mania: Ex tenebricosis, melancholia: Ex concitatis & tenuibus, humorum orgasmus. Ex imminutâ quantitate vel ex influxu prohibito vitalium, syncopes & lipothymia; animalium, stupores torpores & paralyfes. Ex inordinato motu, vertigines; tre-

mores, ex motu trepidationis, & ex concussionis aut vibrationis, convulsiones & spasmi. Ex animi pathematis tantæ tamque repentinæ contingunt in corpore perturbationes, ut aliunde quam à spiritibus repeti nequeant. Tamque gravia & vehementia in morbis ad sensum blandis & levibus, ingruunt aliquando symptomata, ut nullatenus humoribus, ut pote crassius, tot turbis excitandis imparibus, sed spiritibus debeant adscribi: qui quominus habent materiæ, eo majori pollent agendi vi & efficacîa: atque in hisce tanquam suis in effectibus causæ demonstrantur.

*Ergo à Spiritibus Morborum Causæ.*

*Domini Doctores disputaturi.*

*M. Joannes Gaillard.*

*M. Matthæus Dionysius  
Fournier.*

*M. Carolus Thuillier.*

*M. Jacobus Sonhait.*

*M. Carolus Bompart,  
Scholarum Professor.*

*M. Claudius du Fresno.*

*M. Raymundus Finot.*

*M. Matthæus Thuillier.*

*M. Carolus Marteau.*

Proponebat Parisiis JACOBUS FOURNEAU, Parisinus, Baccalaureus Medicus. A. R. S. H. 1701.

---

Apud Franciscum Muguet, Regis & Facultatis Medicinæ  
Typographum.